



PAHAYAGAN SANG PARTIDO KOMUNISTA SANG PILIPINAS ★ ISLA SANG NEGROS

ANG Paghimakas

GINAUBAYAN SANG MARXISMO-LENINISMO-MAOISMO DISYEMBRE 2022

Atubangon ang kusganon ug sustinido nga mga atake sa kaaway! Magpakunot sa agtang aron mamugnaon nga mapasulong ang gubat sa katawhan!

*Komiteng Rehiyunal sa Partido sa Isla sa Negros
Disyembre 26, 2022*



SA MAHINUNG DANONG OKASYON SA IKA-54 nga anibersaryo sa subling pagkatukod sa Partido Komunista sa Pilipinas (PKP), kami, ang Komiteng Rehiyunal sa Partido sa Isla sa Negros (KRPIN), mohatag sa among Pulang saludo sa tanang kadre ug sakop sa Partido sa isla, tanang Pulang kumander ug manggugubat sa *Apolinario Gatmaitan Command-New People's Army Regional Operational Command (AGC-NPA)*, tanang alyadong pwersa sa *National Democratic Front of the Philippines (NDFP)* sa Negros, ug tanang mga progresibo ug patriyotiko nga Negrosanon nga, niini nga tuig, nagpursige ug nagmalampuson sa pagpangibabaw sa makanunayon, dinagko ug bangis nga kontrarebolusyonaryong kampanya nga napasa gikan sa pasistang tiraniya ni Rodrigo Duterte ngadto sa mas grabeng tipo sa terorismo sa estado ilawom ni Ferdinand Marcos Jr.



Ihatag namo ang pinakataas nga rebolusyonaryong pasidungog kang Kaubang Jose Maria Sison (Amado Guerrero), ang atong bantugang lider komunista ug masidlakong giya sa mga Pilipino nga proletaryong rebolusyonaryo, nga mitaliwan pipila ka adlaw sa wala pa ang karon nga adlaw nga komemorasyon. Sa iyang kamatayon, subli natong gipalig-on ang gipanumpaang pagpasulong ngadto sa mas taas nga ang-ang sa Rebolusyong Pilipino nga iyang gisugdan 54 ka tuig na ang milabay uban sa pipila ka kadre gikan sa mga pangmasang organisasyon sa mga mamumuo, mag-uuma ug kabatan-onan.


Gipataas usab namo ang among kinumo kang Kaubang Romeo Nanta (Ka Juanito Magbanua), Kaubang Ericson Acosta ug tanang rebolusyonaryo nga nag-alagad sa katawhan sa tanang posible nga paagi hangtud tinalawan silang gipamatay sa reaksyunaryong kasundaluan.

Hingpit kaming mapasalamaton sa tanang mga rebolusyonaryong martir ug bayani sa ilang dili makikaugalingon nga pag-alagad sa katawhan ug rebolusyon.

Karong tuiga, nakaangkon kita og mga kadaugan sa atong rebolusyonaryong gimuhaton bisan pa man sa mga kasaypanan ug kakulangan. Ang masang Negrosanon hilabihan nga nag-antus diha sa desperasyon sa kaaway nga bungkagon ang rebolusyonaryong kalihukan sa isla. Ang umaabot nga tuig mahinungdanon nga panahon diin gikinahanglan nga kita magpakahanas sa paghiusa sa rebolusyonaryong teorya ug praktika, hingpit nga mokat-on sa mga leksyon nga gilatid sa atong 25-ka-tuig nga pagsumada, mopalig-on sa kahiusahan sa Partido pinaagi sa paghimo og pagsaway ug pagsaway sa kaugalingon, ug mopabilin sa hugot nga kalambigitan sa masa aron pageguro sa kapildihan sa kaaway ug pag-angkon sa mga rebolusyonaryong kadaugan.

Ihatag namo ang pinakataas nga rebolusyonaryong pasidungog kang Kaubang Jose Maria Sison (Amado Guerrero), ang atong bantugang lider komunista ug masidlakong giya sa mga Pilipino nga proletaryong rebolusyonaryo, nga mitaliwan pipila ka adlaw sa wala pa ang karon nga adlaw nga komemorasyon. Sa iyang kamatayon, subli natong gipalig-on ang gipanumpaang pagpasulong ngadto sa mas taas nga ang-ang sa Rebolusyong Pilipino nga iyang gisugdan 54 ka tuig na ang milabay uban sa pipila ka kadre gikan sa mga pangmasang organisasyon sa mga mamumuo, mag-uuma ug kabatan-onan.

DISYEMBRE 2022

ANG **Paghimakas**

Nagapasalamat ang *Ang Paghimakas* sa mga kontribusyon agud mangin madinalag-on ang ini nga isyu. Sa pagpauswag sang aton *Ang Paghimakas*, ginapangabay sa tanan nga bumalasa nga padayon nga mag-amot sang mga balita, piktyur, istorya kag iban pa nga sinulat. Nagapangayo man kami sang inyo mga suhestyon kag komentaryo paano pa gid ini pauswagon.



angpaghimakas@protonmail.com



negrosrevportal.wordpress.com

I. Hilabihan nga nag-antus ang mga Negrosanon ilawom sa kasamtangan nga rehimeng US-Marcos

NAKABENEPISYO PAG-AYO SA PAKIG-ALYANSA KANG Rodrigo Duterte, naangkon ni Ferdinand Marcos Jr ang kapangulohan sa reaksyunaryong rehimen pinaagi sa mini nga kadaugan. Human makapanumpa sa pwesto, nagpakitang gilas si Marcos Jr sa mga *sugar baron* pinaagi sa pagbutang sa *Sugar Regulatory Administration* (SRA) sa kaguliyang gamit ang dili awtorisado nga kamandoan sa importasyon sa kalamay ug pagpwesto sa iyang mga bata-bata sa *sugar bloc*. Isip masunuron nga itoy-itoy sa imperyalismong US, gipatuman niya ang mga *neoliberal* nga dikta sa importasyon sa kalamay nga naghatag dalan sa ismagling, ug sa manipulasyon sa suplay ug presyo. Ang iyang kontrol sa industriya sa kalamay nagpasabot sa dugang krisis sama sa iyang diktador nga amahan nga nakaingon sa kagutom sa isla ug nagpaluyo sa paghari sa kalisang nga nagresulta sa masaker sa Escalante niadtong 1985.

Ang mga dagkong komprador-agalong yutaan nga nagmonopolyo sa liboan ka ektarya sa plantasyon sa tubo ug nanagiyaya sa mayorya nga bahin sa mga sentrales ug sa patigayon sa kalamay sa isla daling nakapahaum sa krisis sa kalamay nga gimugna sa paghari ni Marcos Jr. Kung mokunhod ang ganansya gikan sa produksyon sa kalamay, pilion nilang itransporma ang pila ka bahin sa ilang mga plantasyon sa tubo ngadto sa dili produktibo nga gamit pareho sa *solar fields*, eryang pangkomersyo ug ekoturismo, ug *real estate*, o ikumbertir kini ngadto sa uban pang *high-yielding* nga mga komersyal nga pananom subay sa

demanda sa kalibutanong merkado. Bentaha kini sa mga langyaw ug lokal nga *speculators* ug multinasyunal nga kompaniya nga nagbase-sa-yuta nga naghinamhiman mokuha sa halapad nga kayutaan ug mo-ilog sa natural nga bahandi sa Negros.

Ang mga masa sa Negros, kasagaran mga kabus nga maguuma ug mamumuo sa umahan lakip na ang pipila ka tribo sa tumandok, padayong nag-antos sa dili maagwanta nga pagpahimulos ug pagpanglupig nga nasinati nila sulod sa sobra usa ka siglo. Apan ang mga mamumuo sa kaumahan ang pinakana-ulipon sa siklo sa barato nga kusog pamuo panahon sa abli galing ug sa kagutom sa mga bulan sa tiempo muerto (o panahon sa sirado galing). Ang mamumuo sa kalamay sa isla, sa katubhan ug sentrales, mokabat sa 330,000 ug 15,000, nag-antos sa susamasa-ulipon nga mga kondisyon ug nagdawat sa barato nga suhulan. Mayorya kanila walay nadawat nga bisan unsa man nga benepisyo.

Mokabat sa P410 ang kasamtangang minimum nga suhulan sa mga mamumuo sa agrikultura sa Negros Occidental ug P382-P392 sa Negros Oriental; tataw

nga ubos sa katunga sa P1,119 nga makabuhi nga suhulan nga kinahanglan sa usa ka pamilya nga adunay lima ka myembro aron mabuhi nga disente. Mas grabe pa kay ang mga hacien-dero wala gayud nagpatuman sa *minimum* nga suhulan sa mga hacienda ug mihikaw pa gani sa makatarunganong benepisyo sa ilang mga mamumuo sa uma. Dakong sukwahi ang kasagarang gidawat nga suhulan sa mga mamumuo sa uma nga moabot lang sa P250 ang kada adlaw sa kamahal sa mga batakang panginahanglan lakip na ang kalamay. Sa pikas bahin, duha sa tulo ka mamumuo sa sentrales napailawom na sa kontraktwal nga pamuo.

Tungod sa kawad-on sa suporta sa gobyerno, nag-atubang ang mga gagmay'ng plantador sa kalisdanan sa pagsugakod sa nagkataas nga gasto sa produksyon sa tubo sama sa taas nga presyo sa mga gamitonon sa katubohan (ang maayong kalidad nga abuno moabot sa P3,000 ang presyo kada sako), ug nadala sa nagkalain-laing iskema sa pagpangilog sa yuta ug pagpangusura sa mga karaan ug bag-ong tipo nga agalong yutaan. Nag-atubang sila sa hulga nga mawad-an og yuta ug mapugos



sa pagbaligya sa ilang kusog pamuo. Sa katapusan, daghan kanila mahimong tibuok panahon nga mamumuo sa uma.

Gawas sa produksyon sa tubo, ang mga mamumuo sa uma ug mga nagtikad nga walay kayutaan o dili ba kaha kulang ang kayutaan nga nagprodukto og humay, mais, saging, lubi ug uban pang pananom nakasinati usab sa nagkadaiyang porma sa pyudal ug alang-alang pyudal nga pagpahimulos.

Ang anaa sa mga kasyudaran, sentro sa lungsod ug kabaybayan sa isla nag-atubang usab sa paspas nga nagkagrabe nga mga kondisyon nga gipasamot pa sa rehimeng US-Marcos II. Nag-atubang sa ubos nga suhulan, dinaghan nga pagpanaktak, ku-yanap nga kawalay trabaho, pagsirit sa presyo sa mga bata kang palaliton, ug pagpribitisa sa mga pambubliko nga serbisyo ang mga mamumuo, kabus nga tagadakbayan, alang-alang proletaryado, mananagat, kabatan-onan, propesyunal ug uban pang sektor. Anaa usab ang kumbersyon sa kagamitan sa kayutaan ug reklamasyon nga nagpagrabe sa pagpangilog sa kayutaan, demolisyon ug kadaut sa kinaiyahan.

Ang katawhan sa Negros, sama sa tibuok katawhang Pilipino, nag-antus usab sa uban pang *neoliberal* nga mga atake nga gipatunhay sa paghari ni Marcos Jr. Giprotestahan nila ang nagkataas nga presyo sa lana, importasyon sa mga agrikultural nga produkto ug pag-sulod sa mga dagkong kompaniya sa pagmina. Gibatukan nila ang pagmonopolyo sa yuta sa mga hakog nga mga dagkong komprador-agalong yutaan nga nag-base sa Negros nga nakamugna sa grabeng kagutom ug kakabos nanguna sa masang anak-sabuhat apan nakaapekto usab sa tunga-tungang hut-ong.

Sukwahi niini, ang pamilyang

Marcos naggamit sa panudlanan sa nasud aron ikonsolida ang ilang bahandi ug magtigom pa og dugang, ug mas palig-onon pa ang ilang pulitikal nga kontrol. Ang pundok Marcos-Duterte nagkahiusa sa kontrarebolusyon ug pagka-itoy sa imperyalismong US, apan ang ilang alyansa huyang nga nagpakita na sa mga timailhan sa pagtipak. Ang matag kampo nagkompetensyahanay sa makawkaw nga bahandi ug impluwensya nga nagresulta sa dugang paggrabe sa politikanhong sitwasyon sa nasud.

Nagkakusog ang pagsukol sa katawhan batuk sa imperyalismo, pyudalismo ug burukrata kapitalismo. Nakigbisog sila alang sa makatarunganong suhulan ug mga benepisyo, para sa matikad nga yuta, alang sa daling makuha nga katilingbanong serbisyo sama sa edukasyon, panglawas ug pabalay, para sa nasudnong soberenya, ug pagpaningil sa tulubagon sa rehimen sa iyang korapsyon ug pagkapapet. Desperadong sumpoon ang maong pangmasang pagbatuk, misangpot ang pundok Duterte-Marcos sa terorismo sa estado nga naggamit og kabangis ug pagpanglingla. Gibuhian niini ngadto sa katawhan ang iyang mga lunodpatay nga armadong pwersa hinungdan sa mga mangtas ug bangis nga atake militar hilabi na sa mga komunidad sa mag-uuma sa Negros. Gihikyad sa *Memorandum Order 32* ni Rodrigo Duterte ang sukaranan sa *de facto martial law* ug kuyanap nga pagpangyatak sa tawhanong katungod.

Dayag nga misaka sa 300% ang mga pagpang-abuso sa tawhanong katungod. Gikan sa 44 nga mga nadokumentong kaso sa katapusang unom ka bulan sa rehimeng Duterte, misaka kini sa 178 gikan Hulyo ngadto Disyembre 2022, ang pagsugod sa paghari ni Marcos

Jr. Sa 222 ka insidente karon nga tuig nga naglambigit sa sobra 19,000 ka mga biktima, 17 niini direktang naglambigit sa mga bata. Kini nga mga pag-abuso nga gihimo sa mga pwersa sa estado ug ilang mga paramilitar namonitor sa 73 ka barangay sa 19 ka lungsod ug syudad sa Isla sa Negros, kasagaran kining mahitabo panahon sa mga *focused military operations* (FMO). Sentro sa maong mga pagpanglapas sa tawhanong katungod ang syudad sa Himamaylan sa Negros Occidental ug syudad sa Guihulngan sa Negros Oriental.

Kasagaran nga mga kaso, dungan nga pugos nga nagpanulod sa kabalayan sa mga mag-uuma ang mga elemento sa *Philippine Army* ug nanghulga ug nanghasi sa mga inosenteng mag-uuma nga ilang giakusahan nga mga myembro o tigsuporta sa NPA. Kini nga mga reaksyunaryong kasundaluhan, sa pakigkunsabo sa PNP, ilegal nga miaresto o midakop sa mga sibilyan ug mipailawom kanila sa interogasyon, pagpangulata ug *mental* nga pagtortur. Gipugos nila ang mga sibilyan nga mosur-render isip myembro ug tigsuporta sa NPA, ug gikolekta ang saad nga hinabang gikan sa E-CLIP.

Labaw pa nga nagpatataw sa ngil-ad nga mga epekto sa teror sa estado sa mga Negrosanon ang pinasagad nga pagpangbomba. Ang balaud militar sa syudad sa Himamaylan niadtong Oktubre 2022 nakaapekto sa 18,000 ka indibidwal. Nakadaut usab ang pagpangbomba sa kauhahan, katubhan ug sa kinaiyahan.

Nahimo usab nga komon nga modus sa mga tigpamatay nga militar ang pagtabontabon sa pagpamatay sa mga mag-uuma isip armadong engkwentro. Misaka ang kaso sa walay kaluoy nga pagpamatay sa mga nadakpang rebolusyonaryo nga nawad-



an na og kapasidad nga makig-away (*hors de combat*) subay sa “*take no prisoners*” nga palisiya sa kontra-insurhensiya nga kampanya sa AFP. Ang AFP ug PNP nag-ilogay sa patong sa ulo sa mga rebolusyonaryo. Usa kini ka dakong tinubdan sa ilang korapsyon.

Kuyanap ang *redtagging* sa isla nga nagtumong sa pag-nyutralisa sa mga aktibista ug sa bisan

unsa nga pagbatuk sa paghari ni Marcos Jr. Nahimong nangunang target sa mga kampanya sa *redtagging* ug pagpangdaut sa mga pwersa sa estado ug iyang mga malinglahong makinarya ang mga lider mag-uuma tungod sa nagkahait nga kontradiksyon sa mga pakigbisog sa yuta. Ang pinakagrabeng atake sa ligal nga demokratikong kalihukan sa Negros karon nga tuig mao ang

pagkahanaw sa lider sa mga kabus nga tagadakbayan nga si Iver Larit niadtong Abril.

Hilabihan na ka grabe ang mga kaso sa pagpanglapas sa tawhanong katungod sa Negros apan daghan pa gihapon ang mga panghitabo nga wala mataho ug wala makaabot sa *media* ug mga tigpaluyo sa tawhanong katungod.

Gikan sa pagka-uhaw sa dugo, kabangis ug tiraniya sa rehimeng Duterte, gipatilaw ni Marcos Jr sa ikaduhang bahin sa 2022 ang usa ka tipo sa terorismo sa estado nga nagpataas sa intensidad ug brutalidad sa kontrarebolusyonaryong gyera sa AFP sa Negros ngadto sa lahi nga lebel. Unsa pa man, nakapangibabaw ang rebolusyonaryong kalihukan sa maong mga walay kaulaw ug bangis nga atake kontra sa iyang han-ay ug sa katawhan sa Negros ubos sa paggiya ug pagpangulo sa CPP.

II. Ang rebolusyonaryong kalihukan sa Negros sa pagpangulo sa KRPIN miatubang ug mipakyas sa mga atake sa kaaway

ANG PKP, PINAAGI SA KRPIN, nangulo sa rebolusyonaryong kalihukan sa isla sa Negros. Sa teoretikal nga giya sa Marxismo-Leninismo-Maoismo, naningkamot kita sa pagdapat sa rebolusyonaryong teorya ngadto sa mga kongkretong kondisyon sa isla ug pag-isa sa atong rebolusyonaryong praktika. Nagtinguha kita sa pagsabot, pagtuon ug pagsulbad sa atong mga kasamtangang problema sa atong rebolusyonaryong praktika. Apan ang mas mahukmanon ang pagtransporma sa tukmang ideya ngadto sa rebolusyonaryong praktika.

Ang milabay’ng pagsumada sa rebolusyonaryong kasinatian sa KRPIN gikan sa sayong bahin

sa dekada 90 hangtod sa ulahing mga katuigan tukma nga nagpunting sa ideolohikal, pulitikal ug organisasyunal nga kalig-onan ug kahuyangan sa proletaryadong rebolusyonaryo nga pagpangulo sa rehiyon. Nagpabilin kini nga giya ug punto sa kahiusahan sa mga kadre ug sakop sa Partido sa pagtukod sa atong kusog ug pagtul-id sa mga kasaypanan ug kahuyangan. Maong naangkon ang lawom nga kolektibong kahiusahan ug epektibong pagpatuman sa mga rebolusyonaryong tahas.

Aron mapalambo ang lawom nga tinubdan sa mga kadre sa Partido nga makapatuman sa daghang tahas sa rebolusyon, gipahigayon nato ang tulo-ka-

lebel nga pagtuon sa mga kurso sa Partido sa nagkalain-laing larangang gerilya ug mga puting erya bisan pa man sa mga walay hunong nga operasyong militar. Nakaangkon kita og pagsulong sa pagpahigayon sa tulo ka hugna sa abanteng kurso sa Partido karon tuiga. Nagpadayon ang atong mga paningkamot sa paghatag og edukasyon sa Partido ug mga kurso sa PADEPA, lakip ang mga isyu sa Ang Bayan, Ang Paghimakas ug Ispading, ngadto sa pangmasang ginsakpan sa Partido ug mga rebolusyonaryong pwersa.

Absoluto nga nangulo sa NPA ang PKP sa paglunsad sa nasudnong demokratikong rebolusyon nga may sosyalistang

perspektiba. Kini nga rebolusyong gyera usa ka antagonistiko nga paagi sa pagsulbad sa mga kontradiksyon tali sa gipahimuslan ug gilupigan nga mga mamumuo, mag-uuma ug uban pang hut-ong batok sa dagkong komprador-agalong yutaan, dagkong burukrata ug ilang imperyalistang amo. Ang kasaysayan nagtudlo kanato nga ang pagpahimulos dili mahanaw sa iya lang kaugalingon, kinahanglan ang usa ka demokratiko nga rebolusyong kalihukan sa katawhan aron kini mapapas.

Ang Partido, NPA, rebolusyong kalihukan ug ang katawhan sa Negros nakasinati sa pinakagrabe nga tipo sa mga pagpang-atake nga gilunsad sa mga mapig-otong kahimanan sa iyang kaaway sa hut-ong, ang AFP ug PNP, pinaagi sa mga FMO ug *retooled community support program* (RCSP) sa isla. Apan pinaagi sa pagpangulo sa KRPIN, ang NPA sa Negros ug rebolusyong masa malaparon nga namobilisa sa pagsukol pinaagi sa organisado, siyentipiko ug porsigido nga mga kontra-kampanya nga nagkinaiya sa nagkalain-laing porma sa pakigbisog. Nakalunsad og mga anihilatibo ug atritibo nga mga aksyong militar, nagkadaiyang mga anti-pyudal nga pakigbisog, mga kampanya

batok sa militarisasyon ug paglapas sa tawhanong katungod, nag-organisa og mga tim aron sa pagpalapad sa erya, ug nagpahigayon og mga kampanya sa edukasyon ug pag-organisa kadungan sa uban pang rebolusyong gimbuhaton.

Ang kinatibuk-ang rebolusyong kalihukan sa Negros mas labaw pang determinado nga pakyasong ang kaaway ug ang katuyoan niining dugmukon ang rebolusyong kalihukan sa isla.

Karon nga tuig, ang mga nangulong kadre sa Partido ug kumander sa NPA seryosong naghisgot sa mga mayor o yaweng kutay sa kasinatian sa paglunsad sa armadong pakigbisog panahon sa kontrarebolusyong kampanya sa rehimeng Duterte. Atong gitun-an ang mga problema sa paglunsad sa armadong pakigbisog ug unsaon kini pagsulbad aron mapaabante ang gubat sa katawhan sa isla.

Ubos sa absolutong pagpangulo sa Partido, ang NPA nga anaa sa estratehikong depensiba niatubang sa estratehikong open-siba sa kaaway. Ang kaaway pila ka pilo nga dako ug kusgan itandi sa NPA kalambigit sa ihap ug gidak-on sa pwersa, ihap ug pwersa sa armas, ug uban pang gamhanan nga kagamitan sa gyera

sama sa kanyon, helikopter ug eroplanong pang-atake, 500-libra nga bomba, eroplanong pang-espiya ug *drone*, ug abundang lohistika, pagkaon ug ubang suportang serbisyo. Sa maong panglantaw, ang kaaway hilabihan ka superyor ug ang NPA imperyor. Maingon nato nga kini nga pakig-away usa ka panagsangka tali sa mga dagkong komprador-agalong yutaan batok sa pinaka-gipahimuslan ug gilupigan nga masa.

Apan adunay sukwahi nga kondisyon niini. Una, ang kontrarebolusyong gyera kay kontra-katawhan. Batok kini sa interes sa halapad nga masang mamumuo, mag-uuma ug uban pang gipahimuslan ug gilupigan nga hut-ong. Nanalipod kini sa interes sa usa ka porsiyento sa katilingban nga mao ang mga dagkong komprador-haciendero-agalong yutaan ug mga dagkong burukrata batok sa mayorya sa katawhan sa isla sa Negros. Sa pagkatinuod, sa ilang mga kontra-insurhensya nga operasyon, gipasipad-an nila ang mga mamumuo ug mag-uuma, ug galapas sa tawhanong katungod. Dili makatarunganon ang ilang kontrarebolusyong gyera.

Ang NPA, sa pikas bahin, nagangkon sa walay kinutuban nga suporta sa halapad nga masang



mag-uuma, mamumuo sa uma, mananagat, kabus nga taga-dak-bayan, gagmay'ng propesyunal, kabatan-onan ug kababayan-an tungod nagsuporta ug nanalipod kini sa ilang mga demokratikong katungod ug interes ug nakig-bisog alang sa matuod nga reporma sa yuta ug nasudnong industriyalisasyon. Suportado ug gisalmotan sa katawhan ang rebolusyonaryong gyera sa NPA tungod kini usa ka makatarunganong gyera. Sa maong punto, ang NPA superyor samtang ang kaaway imperyor.

Ikaduha, ubos ang morale ug motibasyon nga makig-away sa mga tropa sa reaksyunaryong hukbo. Kasagaran nga mabatian sila sa masa nga mosulti nga, “sweldo lang ang among giapas,” o dili kaha sa mga engkwentro sa dihang mangayo og dugang pwersa ang kaaway, ang mga moreinpors nga yunit motubag, “maayo kung tinapay ang adtuon, kay magdali mi.” Nahibalo ang mga reaksyunaryong sundalo sa kuyanap nga korapsyon sa mga tag-as nga opisyal militar sa pagpalit sa kagamitan sa gyera, uniporme, botas pangkombat, pinaagi sa E-CLIP ug uban pa. Nasayud usab sila nga gihimo ra silang bala sa kanyon sa ilang mga ambisyosong opisyal nga nagtinguha motaas ang ranggo. Amgo usab sila sa pagpanglimbong sa mga engkwentro, pag-pasurender ug pagpamatay sa mga *hors de combat*. Gitugbangan ni MGen. Arevalo, BGen. Peña ug BGen. Pasaporte ang ilang pagpanglingla pinaagi sa mga ulog-ulog nga pasidungog ug pagdayeg sa ilang mga ordinaryong sundalo tungod sa “maayo” nga trabaho sa pangingkamot nga mapataas ang morale sa tropa ug madasig sila nga makig-away.

Ang pulitikal nga kahiusahan sa mga tropa sa kaaway hilabihan ka huyang o taphaw ug dali lang mabungkag samtang ang mga

Pulang manggugubat gisubhan sa usa ka lig-on nga pulitikal nga kahiusahan, mga sakripisyo ug kalisdanan, hugot nga kinauban nga relasyon tali sa mga opisyal ug manggugubat, ug sa hugot nga kalambigitan sa NPA ug sa masang linupigan ug gipahimulsan. Niini nga hisgutan, superyor ang NPA ug imperyor ang kaaway.

Ikatulo, bisan daghan ang ihap sa mga pasistang tropa sa kaaway (302nd *Brigade*, 303rd *Brigade*, 32nd *Division Reconnaissance Company*, 33rd *Division Reconnaissance Company*, 542nd *Engineering and Construction Battalion*, 16th *Scout Ranger Company*, 33rd *Civil Military Operations Company*, *Military Intelligence Battalion*; ug 6th *Special Action Force Battalion*, 6th ug 7th *Regional Mobile Force Battalion*, ug 1st ug 2nd *Provincial Mobile Force Company* sa PNP; dugang pa ang mga CAFGU), ang kayutaan sa isla sa Negros halapad gihapon alang sa maniob-ra sa NPA. Ang kabanikanhan relatibong halapad ug ang mayorya sa katawhan sa Negros, mag-uuma ug mamumuo sa umahan, nga nagpuyo dinhi lawom nga nagsuporta sa pakig-away sa NPA. Tungod niini, ang NPA superyor samtang ang kaa-way imperyor.


Busa, ang superyoridad sa kaaway dili absoluto. Aduna kini kahuyangan nga makahimo niining imperyor sa NPA. Ang NPA sa samang bahin dili absoluto nga imperyor batok sa iyang kaa-way. Aduna kini kalig-onan nga maghimo niining superyor sa kaaway. Dili malalis nga ang NPA mas superyor sa kaaway hisgutanan sa suporta sa halapad nga masa. Sa estratehiya, ang kaaway superyor, apan, sa taktika, daghan kini og mga kahuyangan nga mahimong mapahimuslan sa NPA sa paglunsad sa mga

atake nga seguradong modaug.

Sa milabay nga 12 ka bulan, giatubang nato ang kaaway pinaagi sa daghang mga aritibong aksyong militar ug pipila ka anihilatibo nga mga taktikal nga opensiba nga naggamit sa superyor nga pwersa batok sa mga huyang nga yunit sa kaaway. Nakalunsad ang mga larangang gerilya ilawom sa *Apolinario Gatmaitan Command* og 44 ka opensibang aksyon ug pagsilot nga miresulta sa labing menos usa ka platon nga patay sa tropa sa kaaway ug laing isa ka platon ang samaron.

Atong gikombinahan ang atong mga kontra-pagliyok nga kampanya sa mga ideolohikal ug pulitikal nga edukasyon ug mga aktibidad para sa atong mga Pulang kumander ug manggugubat. Samtang nakig-away kita sa kaaway, gipataas ug gipahait usab nato ang atong ideolohikal ug pulitikal nga mga hinagiban sa Partido, sa NPA ug rebolusyonaryong pwersa.

Sa atong pag-atubang sa kaaway, gilunsad usab nato ang mga anti-pyudal nga pakigbisog aron ipatuman ang *minimum* nga programa sa reporma sa yuta sa pagpaubos sa abangan sa yuta,



pagwagtang sa usura, pagpataas sa suhulan sa umahan, pagpadako sa presyo sa produkto sa mga mag-uuma ug pagpalambo sa agrikultural nga produksyon ug *sideline* nga panginabuhian. Naglunsad usab kita og mga kampanya para pagbansay sa katawhan sa pagdepensa sa kaugalingon, pagpalambo sa pangpubliko nga panglawas ug sanitasyon, pag-isa sa ilang lebel sa edukasyon ug kultura ug pagpalambo sa yano nga kooperasyon ug produksyon.

Tungod ang Partido dayag nga mideklara sa iyang determinasyon nga militanteng batukan ang mga dinagkong FMO sa kaaway aron depensahan ang katungod ug interes sa katawhan ug ihatag ang hustisya sa tanang biktima sa terorismo sa estado, mitubag ang masa og signipikanteng suporta para sa mga panginahanglan sa mga yunit sa NPA ug daghan kanila ang nadasig nga tibuok-panahon nga mosalmot sa NPA. Madasigon nga mitampo ang masa og bugas, pagkaon ug ubang suplay alang sa ilang tiunay nga sundalo. Sa mga taktikal nga opensiba, pipila kanila ang namobilisa sa pagluto sa pagkaon sa mga yunit sa NPA ug ang uban gitahasan sa pagsunod sa lihoc sa kaaway.

Ang mga kadaugan sa NPA mopataas sa kadasig sa masa. Naghinamhinam sila sa pagtukod sa ilang mga pangmasang organisasyon ug gikan niini motumaw ang mga organo sa gahum pampulitika ug mga lokal nga sanga ug grupo sa Partido. Bisan sa mga paningkamot sa mga reaksyunaryong pwersa nga putlon ang bugkos nga naghiusa sa katawhan ug NPA ug sa Partido nga nangulo niini, atong napabilin ang hugot nga kalambigitan sa masa. Gani, taliwala sa atong pagatubang sa kusganon ug sustinido nga mga atake sa kaaway, nahimo gihapon nato sa kinati-

buk-an ang pagkonsolida ug pagpalapad sa atong baseng masa.

Sa kinatibuk-an, ang sistematiko nga pag-atubang sa armadong kampanya sa pagsumpo sa kaaway usa ka brektru nga gimbuhaton sa Rehiyon ug mga larangang gerilya. Kinahanglang hugot natong huptan ang mga bililhon nga mga leksyon sa atong rebolusyonaryong kasinatian ug ipadayon ang pagpalambo sa lain-laing bahin sa armadong pakigbisog, rebolusyong agraryo ug pagtukod sa baseng masa aron isulong ang atong mga paningkamot nga pakyason ang dinagko ug sustinido nga mga atake sa kaaway.

Samtang maduoton ug militante natong gilunsad ang armadong pagsukol, kinahanglang usab natong huptan ang nagkahiusang prente isip hinagiban sa pagpildi sa kasamtangang rehimeng Marcos. Ang kadunot sa alang-alang pyudal ug alang-alang kolonyal nga nagharing sistema nga gipakita sa pagbalik sa mga Marcos miabli sa oportunidad sa pagtukod og bag-o ug pagpalapad sa nagtunhay nga mga alyansa. Ubos sa pagpangulo sa hut-ong mamumuo, kinahanglang dugang natong palambuon ang batakang alyansa sa mamumuo ug mag-uuma, ang progresibong alyansa sa anak sa buhat ug sa petiburgesya sa kasyudaran, ug patriyotikong alyansa sa mga progresibong pwersa ug paling-paling nga nasudnong burgesya, ug ang lapad nga nagkahiusang prente sa mga patriyotiko ug reaksyunaryong pwersa nga mga temporaryo ug dili istableng alyado batok sa pinakadunot nga reaksyunaryong pwersa, nga niini nga higayon mao ang pundok Marcos-Duterte.

Gilunsad sa mga pwersa sa



estado ang todo gyera dili lang sa kabukiran kundili lakip usab sa kasyudaran. Tumong niini nga piangon ang ligal demokratikong kalihukang masa nga nagpakyapanap sa anti-imperyalista, anti-pyudal ug anti-pasista nga mga panawagan sa katawhan ug nagbutyag sa kontra-katawhan, bangkarute sa moralidad ug kawatan nga rehimeng US-Marcos II. Sa Negros, partikular nga gitarget ang mga lider mag-uuma ug organisador nga nagdala sa anti-pyudal ug anti-pasista nga mga pakigbisog gikan sa kabukiran padulong sa kasyudaran ug sa mata sa publiko.

Bisan pa man nga wala pa niini mabuhian ang hingpit nga potensyal, ang naka-base sa syudad nga ligal nga kalihukang masa sa isla sa milabay nga tuig mipukaw, miorganisa ug mipalihok sa mga mamumuo, kabus nga taga-dakbayan, kabatan-onan ug estudyante, mga drayber, mananagat, mga propesyunal, tawong simbahan, mga tigpanalipod sa kinaiyahan ug ubang mga sektor sa mga kampanya sa pagpataas sa suhulan ug mga benepisyo, pagtapos sa kontraktwalisasyon, pagpahunong sa pagsaka

sa presyo sa lana ug pagba-sura sa *jeepney phaseout*, pag-hunong sa kumbersyon sa gamit sa kayutaan ug reklamasyon, paghunong sa importasyon sa kalamay ug ubang *neoliberal* nga mga palisiya, ug pagtapos sa paglapas sa tawhanong katungod ug pagdemanda og hustisya para sa tanang biktima sa teror sa estado.

Ang ligal nga demokratikong kalihukan nagbutyag sa kadautan sa nagharing sistema ug nagawhag sa katawhan nga mosukol sa reaksyunaryong rehimen. Apan, ang mga porma sa pakigbisog niini dili makausab sa pundamental nga kinaiya sa malupigon ug

mapahimuslanon nga nagharing sistema. Dili kini makasustini batok sa nagpadayon nga pasistang pagpanggukod nga ginahimo sa AFP ug PNP kung dili matukod ang lawom, lig-on ug halapad nga tinagong lubas. Dugang pa, mahulog kini sa tuong oportunistang ug repormismo kung wala ang pagpangulo sa Partido.

Lawom nga naka-ugat ang Partido sa Negros sa masang mamumuo ug mag-uuma. Mayorya sa mga kadre ug sakop sa Partido niini nagpatuman sa rebolusyonaryong gimbuhaton sa kabanikanhan samtang adunay anaa sa mga lokalidad, ug tinago ug ligal nga organisasyong masa.

Naggikan ang iyang ginsakpan sa pinaka-militante nga Pulang manggugubat ug abante nga masang aktibistang mamamuo, mag-uuma, kababayan-an, kabatan-onan ug propesyunal nga nasubhan sa mga pangmasang pakigbisog. Nagkombina kini sa edaran, tunga-tunga ang pangidaron ug batan-on nga kadre sa Partido sa rebolusyonaryong gimbuhaton aron palig-onon ang pagpangulo sa Partido sa tanang lebel ug palambuon ug bansayon ang mga kadre nga adunay kaka-yahan sa pagpatuman sa nagkadayang rebolusyonaryong tahas.

III. Sulbaron ang atong mga kasamtangang problema aron ipaabante ang gubat sa katawhan sa isla

KINAHANGLANG MAHIMONG DETERMINADO UG MILITANTE ang mga kadre ug sakop sa Partido, Pulang kumander ug manggugubat ug mga rebolusyonaryong pwersa ug alyado sa Negros sa pagsukol sa dautan ug kontrarebolusyonaryo apan walay pulos nga plano sa mga bata-bata sa reaksyunaryong rehimen nga bungkagon ang NPA sa Negros ug pwersahon ang tibuok rebolusyonaryong kalihukan nga mosurender. Kasumpay ug kabahin sa gubat sa katawhan sa tibuok nasud, kinahanglan natong sabton, tun-an ug sulbaron ang mga bag-ong problema sa atong espesipikong gubat sa katawhan sa Isla sa Negros base sa mga partikular nga bag-ong sirkumstansya nga mitumaw kuyog sa mga nagtunhay nga kondisyon. Angayan natong hinumduman nga ang mga problema sa gubat mahimong komplikado ug galambo samtang naga-abante ang gubat.

Nanukad sa kontrarebolusyo-

naryong gyera ni Duterte, ang kasamtangang pasista ug kawatan nga rehimen nanawagan sa “pagpakusog sa kapaspason sa operasyon” o “pagpataas sa gikugon sa operasyon” nga nagpasabot sa mas kusganon ug bangis nga dinagkong atake diha sa mga larangang gerilya ug sonang gerilya sa NPA sa ikaduhang bahin sa 2022 hangtud unang bahin sa 2023 sa konteksto sa pagbungkag sa mga rebolusyonaryong pwersa sa Negros sa unang duha ka tuig ni Marcos Jr. Gisistematisa niini ang iyang internal nga planong pangseguridad ug kontra-insurensiya nga mga kampanya, ug gi-optimisa ang kapasidad niini pinaagi sa mga bag-o ug *high tech* nga kagamitan sa gyera. Sa samang higayon, gisensor ang mga impormasyon kalabot sa mga malampuson nga taktikal nga open-siba sa NPA aron ipabilin ang naratibo nga “nabungkag” ug “naphuhayang” na ang mga rebolusyonaryong pwersa sa isla.

Usa kini ka hagit ug kahiga-

yonan sa NPA sa Negros diha sa pagpangulo sa Partido nga sakmiton ang inisyatiba ug angkonon ang serye sa dagko ug gagmay nga mga kadaugan batok sa mga nag-operasyon nga tropa sa kaaway pinaagi sa pulitiko-militar nga pagbatok. Kinahanglang molahutay kitang tanan ug mopangibabaw sa mga kasamtangang hagit aron makabot ang mas dagko pang mga kadaugan sa demokratikong rebolusyon sa katawhan.

Ang Marxismo-Leninismo-Maoismo kinahanglang iaplikar isip hait nga hinagiban sa pagatubang sa kusgan ug bangis nga mga atake sa mangtas nga kaaway. Ingon man, dapat ipatunhay ang balanse sa disiplina ug kagawasan, tali sa kahiusahan sa kabubut-on ug pagtagamtam sa lapad nga wanang sa inisyatiba sa pakig-away sa kaaway pinaagi sa pagsunod sa prinsipyo sa demokratikong sentralismo.

Dakong hagit sa pagkakaran ang pagpangibabaw sa hiktin-

nga-panghunahuna, emperisista ug mekanikal nga mga pamaagi sa pagtuon sa mga problema sa atong gubat sa katawhan sa isla. Lisod nga kanunay sabton ang komplikado nga obhetibong sitwasyon. Sa nasudnong ang-ang, gitudloan ug pamilyar kita sa mga prinsipyo sa operasyon ug gerilyang taktika sa pagpasulong sa gubat sa katawhan. Apan, samtang naglambo ang gubat, daghang mga problema ang kanunay motumaw. Ang karaang problema masulbad ug mapulihan og bag-o. Apan kung ang daan nga mga problema magpabilin nga wala masulbad, masapawan kini sa bag-o ug daghang mga problema ang magtipun-og ug molambo ngadto sa mga komplikadong hisgutanan, ug ang gubat mahimong komplikado usab sa paglabay sa napanahon.

Apan kung iduon nato ang atong mga kolektibong paningkamot ug magpakunot sa agtang aron makahimo og komplikado nga imbestigasyon ug malangkubon nga pagtuki, mahimo natong matul-id ang mekanikal ug emperisista nga mga pamaagi sa pagtuon ug pagsulbad sa mga problema. Mamugnaon dayon natong mapaasdang ang gubat sa katawhan.

Angayan natong ibutang sa hunahuna nga ang mga sirkumstansya bisan unsa kalisod ug kakomplikado, maghatag kanato og mga bag-ong kahigayonan ug moabli sa atong mga mata sa kamatuoran nga wala pa nato masabtan. Dugang hagit kanato unsaon maangkon ang mga kahigayonan ug matransporma sa mas taas nga lebel ang mga kamatuoran nga atong nasabtan aron sulbaron ang mga dagkong problema nga atong giatubang.

Dugang pa, yawe ang ideolohikal ug pulitikal nga kahiusahan sa mga kadre ug sakop sa Partido, sa tibuok pwersa sa

NPA ug sa mga rebolusyonaryong masa aron amgo ug hugot nga mahuptan ang mga panawagan sa Sentral nga kapangulohan sa Partido ug pursigido nga makab-ot ang mga kadaugan samtang nagpasulong sa gubat sa katawhan sa mamugnaon nga paagi. Kinahanglang ipaseguro sa mga organo sa Partido nga ang NPA ug mga rebolusyonaryong masa sa ilang hingtungdan nga mga erya nagkahiusa sa katuyoan, direksyon, ug panawagan para sa pagbatok lakip na ang kabahin sa mga init nga isyu nga nagpagrabe sa kahimtang sa masang mag-uuma ug uban pang linupigan nga hutong.

Kinahanglang pildihon ang mas kusganon ug bangis nga kontra-rebolusyonaryong gyera sa naghari nga reaksyunaryong rehimen.

Ang atong bahandianon nga kasinatian sa gubat sa katawhan nagpamatuod nga ang estratehikong dependensiba sa kinatibukan mahimong matransporma ngadto sa mga taktikal nga opensiba pinaagi sa gerilyang pakig-away. Ang kombinasyon sa paborable nga pisikal ug sosyal nga tereyn sa isla sa Negros ang pinakamaayong kondisyon para sa gamay ug huyang nga mga yunit gerilya sa NPA aron isustini ang paglunsad sa gerilyang pakig-away nga seguradong modaug ug alang sa padayon nga pagpalig-on ug pagpalapad sa NPA. Kinahanglang pangibabawan sa pipila ka yunit sa NPA ang pagpabilin sa konsolidado apan limitado nga espasyo ug pagpasibaya sa mas lapad nga erya nga wala pa maabot. Ang kahigayonan sa lapad nga espasyo mahimong maayo nga magamit sa NPA pinaagi sa



mapangahason ug napanahon nga pagpalapad ug pagkonsolida diha sa mga larangang gerilya ug pagtukod sa mga bag-ong larangang gerilya nga lampas sa kapasidad sa kaaway nga okupahon subay sa pulitiko-militar nga linya sa kuyanap ug sunson nga gerilyang pakig-away sa nagkalapad ug nagkalawom nga baseng masa sa yugto sa estratehikong dependensiba.

Bisan pa man, nagpakuntento kita sa ang-ang nga atong naabot. Kusog nga tendensiya ang dili seryosong pagkonsidera sa mga sirkumstansya ug pagpamenos sa kaaway. Miluag ang atong pagsabot sa atong mga kahuyangan—ang NPA gamay ug huyang nga pwersa samtang ang kaaway dako ug kusgan, ug sa taas nga panahon, nagpabilin kita sa estratehikong dependensiba samtang ang kaaway anaa sa estratehikong opensiba. Samtang nakigbisog kita batok sa konserbationong militar, ang mangtas nga kaaway gidugangang ang iyang kusog ug bangis nga dinagko nga atake. Mga kasaypanan kini nga kinahanglan hugot nga mapangibabawan.

Maong kinahanglan ang atong panghunahuna dili magpundo sa usa ka ang-ang tungod ang mga butang ug proseso sa atong partikular nga rebolusyonaryong gyera wala naghunong kundili anaa sa padayon nga pagbag-o. Kinahanglan natong sabton, tun-an ug sulbaron ang mga ispesipiko nga problema sa atong gubat sa katawhan sa isla sa Negros base sa mga partikular nga sirkumstansya nga anaa kita.

Diha sa mga FMO ug RCSP sa kaaway, adunay daghang target alang sa mga taktikal nga opensiba. Tun-an ug puntingon nato ang mga huyang nga bahin sa kaaway. Ang kusgan ug huyang magkasumpaki nga mga aspeto sa usa ka butang. Ang lig-on nga kolum sa kaaway mahimong huyang human sa pipila ka adlaw sa operasyon. Sa kinatibuk-an, ang nag-opensiba nga kaaway human makasugat og mga kalisdanan, kakapoy ug kagutom sa pipila ka semana nga operasyon matransporma ngadto sa dependensiyang postura. Ang mga sundalo gusto nang mopahuway ug dili na gusto nga makigsangka. Kini kahigayonan nga ang dependensiyang sa NPA matransporma ngadto sa kontra-opensiba ug makalunsad og anihilatibo nga atake batok sa huyang nga seksyon sa kaaway. Aplikable kini bisan sa “rigodon” nga taktika sa kaaway kung diin nagpuli-puli ang ilang tropa aron pakapuyon ang NPA. Tungod sa hilabihan ka pluwido ug paspas nga paglambo sa gubat, ang mga kumander sa NPA kinahanglang hait sa pag-observerba ug pagtuon. Padayon natong tun-an unsaon ang sakto nga paggamit sa superyor nga pwersa sa NPA nga seguradong makabira sa huyang nga bahin sa kaaway. Sa kaso sa mga taktika sa pag-atake (susama sa reyd), kung molunsad og sorpresa nga atake ang konsentrado nga tropa sa

NPA batok sa gamay ug gikapoy nga tropa sa kaaway, mamahimo niining pukanon ang kaaway ug segurado ang kadaugan. Dapat mapangahason, militante ug pурсigido ang mga yunit sa NPA sa pag-atubang sa kaaway ug sa pagdaog.

Sa atong mga anihilatibo nga taktikal nga opensiba, kinahanglan magpakahanas kita sa paggamit og konsentrado nga tropa sa NPA batok sa huyang nga bahin sa kaaway. Ang atong mga atritibo nga aksyon militar dili epektibo nga nakakombina sa atong mga anihilatibo nga aksyong militar. Kinahanglan magbansay kita og mga Pulang manggugubat ug palambuon ang paggamit sa ginagmay nga tim sa pagpahuyang o pagdemoralisa sa dagkong kulom sa kaaway isip preparasyon para sa mga anihilatibong bira sa nangunang yunit sa NPA batok sa huyang nga mga kolum sa kaaway. Seryosong maka-apekto sa moral sa mga personel sa kaaway ug sa ilang materyal nga rekurso ang kuyanap ug makanunayon nga atritibong operasyon sama sa pagbutang og mga *command-detonated* nga eksplosibo sa ruta sa kaaway, pag-isnayp kanila, pag-atake gamit ang granada; ug pag-atake sa ilang linya sa suplay ug transportasyon. Kinahanglan usab natong pahamtangan og silot ang mga lunod-patay nga kontrarebolusyonaryo nga may utang nga dugo sa katawhan.

Ang atong tumong mao ang pagtransporma sa atrisyon padulong sa anihilasyon ug segurohon ang kadaugan. Apan kakuyog niini, kinahanglang magbinantayon kita sa iyang kaatbang—ang pagtransporma sa anihilatibo nga taktikal nga opensiba padulong sa atritibong aksyon. Hatagan nato og prayoridad ang pagsakmit ug pagtigom sa signipikante nga ihap sa armas ug bala gikan

sa kaaway aron matukod ang mga bag-ong yunit sa NPA ug mga larangang gerilya.

Karong tuiga, samtang nakig-away kita sa paglapad ug pagkusog sa mga atake sa kaaway, kinahanglan maningkamot kita nga mapalambo ang kasinatian sa NPA sa pagpakig-away sa pasistang kaaway; sa pagpaabante sa kapasidad sa kumand ug koordinasyon, paniktik, pagplano ug operasyon, sa taktika ug teknika; ug dugang palambuon ang pangkombat nga kapasidad sa mga yunit gerilya sa NPA. Kinahanglang maningkamot kita sa pagsakmit sa inisyatiba ug pagpangibabaw sa pasibidad batok sa nagkakusog ug komplikado nga mga atake sa kaaway. Sa kinatibuk-an, kinahanglang natong pakigbisogan ang nagtunhay nga sulog sa konserbationong militar sa mga yunit sa NPA sa Negros ug mga larangang gerilya.

Kinahanglang lig-on natong ipataas ang pulitikal nga kaamgahan, kaisog ug kompyansa sa mga Pulang kumander ug manggugubat. Ang mga Pulang kumander kinahanglang makat-on magpakunot sa ilang agtang aron nilakang-lakang ug sa mainantuson nga paagi tukma nila nga matun-an ug masulbad ang mga problema sa atong gubat sa katawhan. Kung hait natong gibobserverba ang nagtunhay nga mga kondisyon ug sitwasyon, kung ang atong hunahuna mitakdo o adunay duol nga banabana sa mga obhetibong kondisyon, ma-kahimo kita sa mga tukma nga resolusyon aron pagsulbad sa mga nagtunhay nga problema. Dapat mapaktibo ang pag-rekluta sa NPA ug ang mga politiko-militar nga pagbansay aron mapalambo usab ang kapasidad sa pakig-away sa mga Pulang manggugubat.

Ang mga naglangog-lanog ug

malampuson nga mga taktikal nga opensiba sa NPA naghatag inspirasyon sa katawhan sa Negros ug dugang nagdasig kanila nga mosuporta ug direktang mosalmot sa pag-asdang sa rebolusyonaryong armadong pakigbisog. Naghatag usab kini og inspirasyon ug kadasig sa mga mamumuo, mag-uuma, mamumuo sa uma, kabus nga taga-dakbayan, mga drayber, mananagat, ug petiturbesya sa syudad nga molunsad sa nagkalain-laing porma sa pakigbisog aron ipasulong ang mga ekonomikanhon ug demokratiko nga mga demanda batuk sa pagpahimulos ug pagpanglupig sa reaksyunaryong nagharing hutong sa mga dagkong negosyante-komprador, dagkong agalong yutaan-haciendero ug burukrata militar sa isla.

Taliwala sa nagkagrabeng krisis sa alang-alang kolonyal ug alang-alang pyudal nga nagharing sistema, gikinahanglan nga halapad nga mapukaw, ma-organisa ug mamobilisa ang katawhan sa ilang ekonomikanhon ug pulitikanhon nga mga kalihukan subay sa nasudnon demokratikong linya aron ipasulong ang ilang hutonganon, sektoral ug nasudnon nga mga demanda. Dapat natong pahaiton ang atong pagsabot sa mga mapahimuslanon ug malupigon nga kondisyon nga giantus sa katawhan pinaagi sa makanunayon nga pagpahigayon og katilingbanong pakisusi. Nagkat-on kita gikan sa masa sa mga tukmang paagi, taktika ug metodo sa dinaghan nga pagpukaw, pag-organisa ug pagpalihok sa katawhan. Kinahanglan ipaseguro nato ang pulitikal nga edukasyon sa mga lider ug masang aktibista, ug sa halapad nga langkub sa nasudnong demokratikong propaganda sa tanang pangmasang kampanya.

Dapat palaparon ug paligonon pinaagi sa maintuson nga pagtrabaho ang mga nakabase-

sa-syudad nga organisasyong masa sa mga mamumuo, kabus nga taga-dakbayan, kabatanonang estudyante, ubos-ang-kita nga propesyunal ug intelektwal ug uban pang demokratikong sektor. Ang mga pangmasang mobilisasyon ug kampanyang masa kinahanglan dili lang “sweeping”. Pamaagi kini sa paggamit sa nagtunhay nga kusog sa mga organisasyong masa ingon man pamaagi sa pagdani sa dugang pang mga myembro.

Ang demanda sa pagpataas sa suhulan ug mga benepisyo base sa makabuhi nga suhulan (*family living wage*) alang sa mga mamumuo, mamumuo sa uma, alang-alang proletaryado, ug mag-uuma (panapanahon mahimong mga mamumuo sa umahan ang mga kabus nga mag-uuma ug ubos sa tunga-tungang mag-uuma) kinahanglang hatagan og prayoridad karong tuiga taliwala sa patuyang nga pagsaka sa presyo sa lana ug mga palaliton. Kinahanglan usab hugot nga batukan ang kuyanap nga pagpangilog sa kayutaan ubos sa islogan sa kalambuan sa tibuok isla pinaagi sa kumbersyon sa kagamitan sa kayutaan ug mga proyektong reklamasyon nga magdislokar sa kabalayan ug panginabuhian sa mga mag-uuma, mananagat, kabus nga taga-dakbayan ug ubos nga saray sa tunga-tungang hutong; makaapekto sa produksyon sa pagkaon; ug makaguba sa kinaiyahan. Kinahanglang makabig nato ang mga tawong simbahan, akademya, pulitiko, abugado ug uban pang sektor aron pagkuha sa ilang suporta alang sa kalihukang masa batok sa mga bira sa imperyalistang neoliberal nga opensiba ug sa kasamtangang kawatan nga rehimen.

Dapat dugang palaparon ang pagsukol sa grabe nga militarisasyon sa kabanikanhan ug kuyanap nga paglapas sa tawhanong

katungod sa tibuok Negros ug kinahanglang maka-abot sa publiko ug internasyunal nga komunidad ang mga anti-pasistang panawagan. Sa pagpakig-away sa ilang tiunay nga sundalo alang kanila, ang masa nga gipangulohan sa ilang mga pangmasang organisasyon kinahanglan mo-organisa sa ilang kaugalingon ug molunsad sa anti-pasista nga kampanya aron palayason sa ilang mga komunidad ang mga FMO ug RCSP. Ang mga mangtas nga mga krimen nga gihimo batok sa mga mag-uuma, kababayen-an ug kabataan diha sa kuganon ug bangis nga armadong kampanya sa pagsumpo sa AFP ug PNP sa Negros kinahanglang halapad nga mabutyag ug mabatukan. Kini dugang makapalanog sa panawagan sa pagtapos sa *de facto martial law* sa isla nga ninggrabe sukad sa pagpatuman sa *Memorandum Order 32* ug NTF-ELCAC.


Ang pinakabangis nga paglapas sa tawhanong katungod gihimo sa mga dagkong komprador-haciendero-agalong yutaan aron pagpalong sa kinabuhig-ugkamatayon nga pakigbisog sa mga Negrosanong mag-uuma ug mamumuo sa umahan batok sa pyudal ug alang-alang pyudal nga pagpahimulos ug pagpanglupig diha sa usa ka *monocrop* nga ekonomiya sa kalamay. Busa, ang mga anti-pasista nga pakigbisog kinahanglang isumpay ug iisa ngadto sa anti-pyudal ug anti-imperyalista nga linya.

Ang Partido sa Negros kinahanglan makanunayon nga magpalig-on sa kaugalingon aron epektibo nga makapangulo sa demokratikong rebolusyon sa katawhan sa isla. Samtang gipatuman nato ang atong mga rebolusyonaryong tahas aron mahatagan og katumanan ang atong plano karong tuiga, kinahanglan palaparon ang atong han-ay nga amgo nga dili tugotan


nga makasulod ang bisan isa nga dili angayan. Kinahanglan usab ang pagpadala sa mga kadre ug sakop sa Partido gikan sa kasyudaran padulong sa kabanikanhan para sa gubat sa katawhan. Ang mga rebolusyonaryo nga aktibista kinahanglan adunay programa sa ilang pagsalmot sa rebolusyonaryong gimbuhaton hi-labi na sa armadong pakigbisog.

Samtang gipakusog nato ang armadong pakigbisog sa isla kadungan sa lagsik nga dayag

nga kalihukang masa, ang mga rebolusyonaryong pwersa sa Partido, NPA ug mga organo sa gahum pampulitika mapalig-on ingon man ang nagkahiusang prente batok sa rehimeng US-Marcos II. Mabutang dayon kita sa pinaka-paborableng posisyon aron makatampo sa nasudnong pag-asdang sa demokratikong rebolusyon sa katawhan hangtod sa hingpit nga kadaugan. **AP***



NegrosRevPortal



LONG
LIVE
THE
CPP



Serve The Revolution
Serve The People
#CPP54